

যোয়েল ভাববাদের পুস্তক

পঙ্কপাল ফসল ধ্বংস করবে

1 পথুয়েলের পুত্র যোয়েলের কাছে প্রভুর এই বার্তা:

2 হে প্রবীণেরা, কথাটা শোন!

দেশে বসবাসকারী সকলে শোন।

তোমাদের জীবন কালে এর আগে কি কখনও এই রকম ঘটনা ঘটেছে?

না! তোমাদের পিতৃপুরুষদের সময়ও কি এই রকম কোনো ঘটনা ঘটেছে? না!

3 তোমাদের সন্তানদের এই সম্বন্ধে বলো।

তোমাদের সন্তানরা তাদের সন্তানদের বলুক।

আবার তাদের সন্তানরা তাদের পরবর্তী প্রজন্মকে বলুক।

4 কাটুরে পঙ্কপাল যা রেখে গেছে

তা বাঁকের পঙ্কপাল খেয়ে গেছে।

আর বাঁকের পঙ্কপাল যা রেখে গেছে

তা লাফানে পঙ্কপাল খেয়ে গেছে।

আর লাফানে পঙ্কপাল যা রেখে গেছে

তা ধ্বংসকারী পঙ্কপাল খেয়ে গেছে।

পঙ্কপাল এল

5 ওহে মাতালরা ওঠ, কাঁদো!

ওহে মদ্যপায়ীরা,

মিষ্টি দ্রাক্ষারসের জন্য হা-হতাশ কর!

কারণ তা তোমাদের মুখ থেকে কেড়ে নেওয়া হয়েছে।

6 এক বিশাল ও শক্তিশালী দেশ আমার দেশকে আক্রমণ করেছে।
সেখানে অগনিত সৈন্য ছিল।
তাদের অস্ত্রগুলি সিংহের দাঁতের মত ধারালো
এবং সিংহের চোয়ালের মত শক্তিশালী।

7 এটি আমার দ্রাক্ষা ক্ষেত্র
ও ডুমুর গাছগুলো ধ্বংস করেছে।
এটি ডুমুর গাছের ছাল ছাড়িয়ে নিয়ে তা ফেলে দিয়েছে,
তাই তার শাখাগুলি সাদা হয়ে গেছে।

লোকের এন্দন

8 যার যুবক স্বামী মারা গেছে,
সেই যুবতী মহিলার মত চটের পোষাক পরে কাঁদে।
9 প্রভুর মন্দিরে আর নৈবেদ্য ও পানীয় উৎসর্গ করা হয় না।
তাই যাজকগণ! প্রভুর দাসরা, শোক প্রকাশ করো!
10 ক্ষেত্রগুলি বিনষ্ট হয়ে গেছে,
মাটি শুকিয়ে গেছে।
সমস্ত শস্য নষ্ট হয়ে গেছে।
নতুন দ্রাক্ষারস শুকিয়ে গেছে।
টাটকা অলিভ তেল শেষ হয়ে গেছে।
11 ওহে চাষীরা তোমরা দুঃখ কর!
দ্রাক্ষা ক্ষেত্রের চাষীরা হাহাকার কর!
গম ও যবের জন্য কাঁদো!
কারণ ক্ষেত্রের ফসল ধ্বংস হয়ে গেছে।
12 দ্রাক্ষালতা শুকিয়ে গেছে।
ডুমুর গাছ মারা গেছে।
ডালিম, তাল ও আপেল,
এমনকি ক্ষেত্রের সমস্ত গাছ শুকিয়ে গেছে।
সত্যি লোকদের মধ্যে যে সুখ ছিল তা শুকিয়ে গেছে।
13 হে যাজকগণ, চটের পোষাক পরে উচ্চস্বরে কাঁদো।

তোমরা যারা বেদীর পরিচারকরা উচ্চস্বরে কাঁদো।
 হে ঈশ্বরের দাসরা চটের পোশাক পরে ঘুমিয়ে থাকো।
 কারণ ঈশ্বরের মন্দিরে উৎসর্গ করার জন্য কোন শস্য নৈবেদ্য
 ও পেয় নৈবেদ্য থাকবে না।

পশুপালের দ্বারা ভয়ানক ধ্বংস কাণ্ড

14 উপবাসের জন্য একটি বিশেষ সময় ঘোষণা করো। বিশেষ সভার
 জন্য লোকদের একত্র করো। দেশের সমস্ত লোক ও নেতাদের একত্র
 করো। তাদের সবাইকে তোমার প্রভু ঈশ্বরের মন্দিরে নিয়ে এস এবং
 সাহায্যের জন্য প্রভুর কাছে খুব জোরে কান্নাকাটি কর।

15 বিমর্ষ হও! কারণ প্রভুর সেই বিশেষ দিন সন্মিকটা। সেই
 সময় থেকে ঈশ্বর সর্বশক্তিমানের কাছ থেকে আক্রমণের ন্যায় শাস্তি
 আসবে।

16 একি সুস্পষ্ট নয় যে আমাদের কোন খাদ্য নেই? এটা কি সুস্পষ্ট
 নয় যে আনন্দ এবং সুখ আমাদের প্রভুর মন্দির থেকে চলে গিয়েছে?

17 আমাদের শস্য বীজ মাটিতে পচে নষ্ট হয়ে গিয়েছে। গুদামগুলো
 ধ্বংস হয়ে গিয়েছে। আমাদের গোলাবাড়িগুলো শূন্য এবং ভেঙ্গে
 পড়েছে কারণ আমাদের শস্য শুকিয়ে গেছে এবং মৃত।

18 পশুগুলো কাঁদছিল! গরুর পাল ঘুরে ঘুরে বেড়াচ্ছে। কারণ
 তাদের খাবার ঘাস নেই। এমনকি মেঘেরাও কষ্ট পাচ্ছে কারণ আমরা
 পাপ কার্যের জন্য অপরাধী।

19 প্রভু আমি সাহায্যের জন্য তোমায় ডাকছি, কারণ প্রান্তরের
 চারণভূমি আগুনে পুড়ে গেছে এবং খোলা মাঠের সমস্ত গাছ তাতে
 ঝলসে গেছে।

20 এমনকি পশুরাও তোমার কাছে কাঁদবে কারণ জলের বর্ণাগুলো
 শুকিয়ে গেছে আর আগুন সবুজ ক্ষেত্রে ছড়িয়ে পড়ে তাদের
 মরুভূমিতে পরিণত করেছে।

2

প্রভুর আগমনের দিন

1 সিয়োনে শিঙা বাজাও।

আমার পবিত্র পর্বতে জোরে চিৎকার করো।

দেশের সমস্ত বাসিন্দারা

ভয়ে কেঁপে উঠুক।

কারণ প্রভুর দিন আসছে

এবং তা সন্নিকট।

2 সেটা এক অন্ধকার, বিষণ্ণ দিন হবে।

এটা অন্ধকার এবং মেঘলা দিন হবে।

অন্ধকার যে ভাবে পর্বতে ছেয়ে যায়

সেই ভাবে বিশাল ও শক্তিশালী সৈন্য দেখা যাবে।

এর আগে কখনও এমন হয় নি।

আর এর পরেও এমন হবে না।

3 আগুন তাদের সামনে গ্রাস করবে

এবং অগ্নিশিখা তাদের পশ্চাতে জ্বলবে।

তাদের সামনের দেশ হবে

যেন এক এদোন উদ্যান।

কিন্তু তাদের পশ্চাতে দেশ

যেন শূন্য মরুভূমি।

কোন কিছুই তাদের এড়িয়ে যাবে না।

4 তাদের দেখতে ঘোড়ার মত।

আর যুদ্ধের ঘোড়ার মতো তারা দৌড়ায়।

5 ঐ শোন পর্বতের ওপর তাদের রথের শব্দ।

সেই শব্দ খড় জ্বালানো আগুনের শব্দের মতো

এবং একটি শক্তিশালী সৈন্য বাহিনীর মত

যারা যুদ্ধ করতে আসছে।

6 ঐ সৈন্যদলের সামনে লোকে ভয়ে কাঁপে।

তাদের মুখ ভয়ে বিবর্ণ হবে।

7 তারা দ্রুত দৌড়ায়

এবং যোদ্ধাদের মতো তারা প্রাচীরে চড়তে পটু।

তারা কুচকাওয়াজ করে সামনে এগিয়ে যায়।

তারা তাদের পথ থেকে সরে যায় না।

8 তারা একে অন্যের সঙ্গে ধাক্কাধাক্কি করে না।

প্রত্যেক সৈন্য তার নিজের পথে চলে।

এমনকি যদি একজন সৈন্য আহত হয়ে পড়ে

অন্যরা ঠিক ভাবেই কুচকাওয়াজ করে চলে।

9 তারা শহরের মধ্যে দৌড়ে যায়।

তারা দ্রুত প্রাচীরের উপর ওঠে।

ঘরের মধ্যে উঠে পড়ে।

জানালা দিয়ে চোরের মত ঢুকে পড়ে।

10 তাদের সামনে যেন পৃথিবী ও আকাশ কেঁপে ওঠে।

সূর্য ও চাঁদ অন্ধকার হয়ে যায়। তারারা উজ্জ্বলতা প্রকাশ বন্ধ করে।

11 প্রভু নিজে তার সৈন্যদের চিৎকার করে ডাকছেন।

তঁর শিবির খুব বড়।

সত্যি সেই সৈন্যরা তঁর আদেশ মানে।

তারা খুবই শক্তিশালী।

প্রভুর দিন হবে সত্যি তীব্র ও ভয়ানক;

কে তা সহ্য করতে পারে?

পরিবর্তনের জন্য লোকদের কাছে প্রভুর আহবান

12 প্রভু বললেন,

“এখন তোমরা সর্বান্তঃকরণে আমার কাছে ফিরে এস।

উপবাস, রোদন ও বিলাপ করতে করতে এস।

13 আর তোমাদের হৃদয় ছিন্ন কর, তোমাদের বস্ত্র নয়।”

তোমাদের প্রভু ঈশ্বরের কাছেই ফিরে এস।

কারণ তিনি কৃপাময়।

তিনি চট করে রেগে ওঠেন না।

তিনি মহা দয়াময়।
 হয়তো তিনি যে অমঙ্গলের পরিকল্পনা করেছিলেন
 সে বিষয়ে তাঁর মন পরিবর্তন করবেন।
 14 কে জানে, প্রভু হয়তো তাঁর মন পরিবর্তন করতে পারেন।
 এমনকি তিনি হয়তো তোমাদের জন্য পশ্চাতে আশীর্বাদ রেখেও
 যেতে পারেন।
 তাহলে তোমরা প্রভু, তোমাদের ঈশ্বরের উদ্দেশ্যে
 বলি ও পেয় নৈবেদ্য উৎসর্গ করতে সক্ষম হবে।

প্রভুর কাছে প্রার্থনা কর

15 সিয়োনে শিঙা বাজাও।
 উপবাসের দিন ঠিক কর।
 বিশেষ সভার দিন ঘোষণা কর।
 16 লোকদের একত্র কর।
 বিশেষ সভা ডাক।
 বয়স্ক লোকদের একত্র কর।
 শিশু ও বাচ্চাদের একত্র কর।
 বর ও কনেরা তাদের শয্যা ঘর
 থেকে বেরিয়ে আসুক।
 17 বারান্দা ও বেদীর মধ্যে
 যাজকরা, প্রভুর দাসেরা কাঁদুক।
 তাদের সবাই বলুক:
 “প্রভু তোমার লোকদের প্রতি কৃপা কর।
 তোমার লোকদের লজ্জায় পড়তে দিও না।
 অন্য দেশের লোকদের তোমার লোকদের নিয়ে ঠাট্টা করতে
 দিও না।
 অন্য দেশের লোকদের হেসে বলতে দিও না,
 “ওদের ঈশ্বর কোথায়?””

প্রভু আবার দেশ পুনঃস্থাপন করবেন

18 তখন প্রভু তাঁর দেশের জন্য ঈর্ষাকাতর হবেন

এবং তাঁর লোকদের দয়া করবেন।
 19 তখন প্রভু তাঁর লোকদের সঙ্গে কথা বললেন,
 এবং বললেন, “আমি তোমাদের কাছে শস্য দ্রাক্ষারস ও অলিভ তেল
 পাঠাবো
 এবং তোমরা প্রচুর পাবে ও তাতে তোমরা সন্তুষ্ট হবে।
 আমি আর অন্য দেশকে তোমাদের কখনও অপমান করতে দেব না।
 20 আমি উত্তর দেশীয় লোকদের তোমাদের কাছ থেকে বহু দূরে পাঠাব
 এবং আমি তাদের শুষ্ক ও ধ্বংসপ্রাপ্ত দেশে নির্বাসনে পাঠাব।
 আমি তাদের কিছুকে পূর্বদিকের সমুদ্রে
 এবং কিছুকে পশ্চিমের ভূমধ্যসাগরে পাঠাব।
 তারা পচে যাবে
 এবং তাদের পুত্তিগন্ধ ওপরে উঠবে,
 কারণ তারা অনেক ক্ষতি করেছে।”

ভূমিকে নবায়িত করা হবে
 21 হে দেশ, ভয় কোরো না।
 আনন্দ অনুষ্ঠান কর
 কারণ প্রভু মহৎ মহৎ কাজ করবেন।
 22 মাঠের পশুরা ভয় পেয়ো না
 কারণ প্রান্তরের ভূমিতে আবার ঘাস জন্মাবে।
 গাছে আবার ফল ধরবে,
 এবং ডুমুর ও দ্রাক্ষা গাছে আবার উত্তম ফল হবে।

23 সিয়োনের লোকরা তোমরা প্রভু ঈশ্বরেরেতে আনন্দ অনুষ্ঠান কর।
 কারণ তিনি তাঁর উদারতার চিহ্ন হিসাবে বৃষ্টি বর্ষাবেন।
 তা ছাড়াও তিনি আগের মতোই
 তোমাদের আগে আগে বৃষ্টি ও শেষের দিকে বৃষ্টি দেবেন।
 24 আর টেকির মেঝেগুলি শসে ভরে যাবে,
 অলিভ তেলে ও দ্রাক্ষারসে পিপেগুলো ভরে উপচে পড়বে।
 25 “আমি তোমাদের বিরুদ্ধে

যে সমস্ত ঝাঁকের পঙ্কপাল,
লাফানে পঙ্কপাল,
ধ্বংসকারী পঙ্কপাল,
এবং কাটুরে পঙ্কপাল অর্থাৎ আমার মহা সৈন্যেরা পাঠিয়েছিলাম
যারা সেই বছর তোমাদের শস্য ধ্বংস করেছে
তা আমি পরিশোধ করব।
26 তোমরা প্রচুর খাবার খেয়ে
তৃপ্ত হবে
এবং প্রভু তোমাদের ঈশ্বরের নামের প্রশংসা করবে।
কারণ তিনি তোমাদের জন্য অলৌকিক চমৎকার কাজ
করেছেন।
প্রভু বলেন, আমার লোকেরা আর কখনও লজ্জিত হবে না।
27 আর তোমরা জানবে যে আমি (প্রভু) ইস্রায়েলের মধ্যে বাস করি।
আমিই তোমাদের প্রভু ও ঈশ্বর
আর কোন ঈশ্বর নেই।
আমার লোকেরা আর কখনও লজ্জিত হবে না।”

ঈশ্বর সমস্ত লোকদের তাঁর আত্মা দেবেন
28 “এখন থেকে আমি আমার আত্মা সবার মধ্যে ঢেলে দেব।
এর ফলে তোমাদের ছেলেমেয়েরা ভাববাণী বলবে।
বয়স্ক লোকেরা স্বপ্ন দেখবে
আর তোমাদের কণিষ্ঠেরা দর্শন পাবে।
29 আর সেই সময় আমি এমনকি,
তোমাদের দাসদাসীদের ওপরও আমার আত্মা ঢেলে দেব।
30 আমি আকাশে ও পৃথিবীতে চিহ্ন দেখাব।
রক্ত, আগুন ও ধোঁয়ার স্তম্ভ দেখা যাবে।
31 সূর্য অন্ধকার হয়ে যাবে, চাঁদ রক্তের মত লাল হয়ে যাবে।
আর তারপর প্রভুর সেই মহান ও ভয়ঙ্কর দিন আসবে।
32 আর যারাই প্রভুর নাম ডাকে তারা রক্ষা পাবে।
কারণ প্রভুর বাক্যানুসারে ঐ সমস্ত লোক সিয়োন পর্বতে
ও জেরুশালেমে বেঁচে থাকবে।

হ্যাঁ, ঐ সমস্ত বেঁচে যাওয়া লোক, যাদের প্রভু ডেকেছেন তারাই ফিরে আসবে।

3

যিহূদার শত্রুদের প্রতি প্রভুর শাস্তি

1 “সেই সময় আমি যিহূদা ও জেরুশালেমের লোকদের বন্দী দশা হতে ফিরিয়ে আনব।

2 আমি সমস্ত দেশকে একত্র করে যিহোশাফটের উপত্যকায় নিয়ে আসব। সেখানে আমি তাদের বিচার করব। সেই দেশের লোকরা আমার ইস্রায়েলের লোকদের ছিন্ন ভিন্ন করেছিল। তারা তাদের অন্য দেশের মধ্যে বাস করতে বাধ্য করেছিল। সেই জন্য আমি সেইসব দেশকে শাস্তি দেব। ঐসব দেশ আমার দেশকে নিজেদের মধ্যে ভাগ করেছিল।

3 তারা আমার লোকদের জন্য গুলিবাট ব্যবহার করেছিল। তারা এক বেশ্যার জন্য ছেলেকে এবং পান করবার জন্য দ্রাক্ষারসের বিনিময়ে মেয়েকে বিয়ে করেছিল। এমন কি তারা।

4 “হে সোর ও সীদোন এবং পলেষ্টীয়দের সমস্ত অঞ্চল আমার প্রতি তোমাদের মনোভাব কি? কোন কিছুর জন্য কি তোমরা আমায় শাস্তি দিচ্ছ? তোমরা কি মনে কর আমাকে আঘাত করার জন্য কিছু করতে যাচ্ছ? শীঘ্রই আমি তোমাদের কাজের ফল হিসেবে তোমাদের শাস্তি দেব।

5 তোমরা আমার রূপো ও সোনা নিয়ে গিয়েছ এবং আমার অতি উৎকৃষ্ট জিনিসগুলি তোমাদের মন্দিরে নিয়ে গিয়েছ।

6 “তোমরা যিহূদার ও জেরুশালেমের লোকদের গ্রীকদের কাছে বিক্রি করে দিয়েছ, যেন তারা তাদের দেশ থেকে বহু দূরে নিয়ে যেতে পারে।

7 তাদের যে যে স্থান বিক্রি হয়ে গেছে আমি তাদের সেখানে থেকে ফিরিয়ে আনব এবং আমি তোমাদের খারাপ কাজের জন্য শাস্তি দেব।
 8 আমি তোমাদের সন্তানদের যিহুদার লোকদের কাছে বিক্রি করব এবং তারা বহু দূরের শিবায়ীয়া লোকদের কাছে তাদের বিয়ে করবে।”
 প্রভু এই কথাগুলি বলেছেন।

যুদ্ধের প্রস্তুতি

- 9 তোমরা জাতিগণের কাছে এই কথা ঘোষণা কর:
 তোমরা যুদ্ধের জন্য নিজেদের প্রস্তুত কর!
 বলবান সৈন্যদের জাগিয়ে তোল!
 সমস্ত যোদ্ধা যুদ্ধে প্রবেশ করুক।
- 10 তোমাদের লাঙ্গল ভেঙ্গে খড়্গ তৈরি কর
 এবং কাস্তে ভেঙ্গে বর্শা তৈরি কর।
 দুর্বল যে, সেও বলুক,
 “আমি একজন বলবান যোদ্ধা।”
- 11 হে চারি দিকের জাতিগণ,
 তোমরা তাড়াতাড়ি এস এবং এখানে এসে জড়ো হও!
 হে প্রভু তোমার বলবান সৈন্যদের আনো!
- 12 জাতিগণ জেগে ওঠ!
 যিহোশাফটের উপত্যকায় এস!
 আমি সেখানে বসে
 চারি দিকের জাতির বিচার করব।
- 13 কাস্তে লাগাও
 কারণ শস্য পাকছে!
 এস দলন কর
 কারণ দ্রাক্ষা মাড়বার কুণ্ড পূর্ণ!
 পিপে ভরে উপচে পড়ছে
 কারণ তাদের দুষ্টতা মহান।
- 14 দণ্ডাজ্ঞার উপত্যকায়
 প্রচুর লোকের ভীড়

কারণ দণ্ডাজ্ঞার উপত্যকায়
 প্রভুর বিশেষ দিন এগিয়ে আসছে।
 15 সূর্য ও চন্দ্র অন্ধকার হয়ে যাবে,
 আকাশের নক্ষত্রও আর আলো দেবে না।
 16 আর প্রভু ঈশ্বর সিয়োন থেকে গর্জন করবেন
 এবং তিনি জেরুশালেম থেকেও চিৎকার করবেন।
 ফলে আকাশ ও পৃথিবী কেঁপে উঠবে।
 কিন্তু প্রভু ঈশ্বর
 তাঁর লোকদের পক্ষে এক নিরাপদ আশ্রয়
 এবং তিনিই ইস্রায়েল সন্তানদের
 পক্ষে দৃঢ় দুর্গ হবেন।
 17 “তখন তোমরা জানবে যে
 আমিই প্রভু তোমাদের ঈশ্বর,
 আমি আমার পবিত্র পর্বত সিয়োনে বাস করি।
 আর জেরুশালেম পবিত্র হবে।
 বিদেশীরা আর তার মধ্যে দিয়ে
 যাতায়াত করবে না।

যিহুদার জন্য নতুন জীবনের প্রতিশ্রুতি

18 “সেই দিনে পর্বত থেকে
 মিষ্ট দ্রাক্ষারস বারে পড়বে
 এবং উপপর্বত থেকে দুধের স্রোত বইবে।
 যিহুদার সমস্ত শূন্য নদী জলে পূর্ণ হয়ে বইবে।
 প্রভুর মন্দির হতে এক উৎস বের হবে,
 যা আকশিয়া উপত্যকাকে জল যোগাবে।
 19 মিশর ধ্বংস স্থান হবে
 এবং ইদোম ধ্বংসিত প্রান্তরে পরিণত হবে।
 কারণ তাদের নিষ্ঠুরতা যিহুদার লোকদের বিরুদ্ধে দেখানো
 হয়েছে।
 তারা নির্দোষ লোকদের
 তাদের দেশেই হত্যা করেছিল।

20 কিন্তু যিহুদাতে সর্বদাই
লোকে বাস করবে,
লোকে বহু বংশ পরম্পরায়
জেরুশালেমে বাস করবে।

21 ওই লোকরা আমার লোকদের হত্যা করেছিল,
তাই সত্যি সত্যিই আমি তাদের লোকদের শাস্তি দেব!
প্রভু ঈশ্বর সিয়োনে বাস করবেন!

পবিত্র বাইবেল
Bengali Holy Bible: Easy-to-Read Version™
পবিত্র বাইবেল

copyright © 2001-2006 World Bible Translation Center

Language: বাংলা (Bengali)

Translation by: World Bible Translation Center

This copyrighted material may be quoted up to 1000 verses without written permission. However, the extent of quotation must not comprise a complete book nor should it amount to more than 50% of the work in which it is quoted. This copyright notice must appear on the title or copyright page:

Bengali Holy Bible: Easy-to-Read Version™ Taken from the Bengali HOLY BIBLE: EASY-TO-READ VERSION™ © 2007 by World Bible Translation Center, Inc. and used by permission.

When quotations from the ERV are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials (ERV) must appear at the end of each quotation.

Requests for permission to use quotations or reprints in excess of 1000 verses or more than 50% of the work in which they are quoted, or other permission requests, must be directed to and approved in writing by World Bible Translation Center, Inc.

Address: World Bible Translation Center, Inc. P.O. Box 820648 Fort Worth, Texas 76182

Email: bibles@wbtc.com Web: www.wbtc.com

Free Downloads Download free electronic copies of World Bible Translation Center's Bibles and New Testaments at: www.wbtc.org

2013-10-15